

1980  
revista di  
centro di bario noord

# Taray

PORT PAYE — Fls. 3,—

Cu Paoco trese alegria i  
tranquilidad den bo hogar  
acompañá cu un Aña Nobo  
jen di salud i prosperidad  
den compania di bo famia  
ta nos sincero dese

Osticeba  
Fergusonstraat 62-B





BENNY MARAPIN

PEDRO FIGAROA

RAYMOND HERNANDEZ

*December ta un luna yen  
di amor y pas  
ta un tempo pa bo muestra  
bo bondad na un pober un anciano  
o na esunnan bandoná  
Cu bo yudansa i bondad lo bo  
pone un cara sonrei  
reflehando felicidad.*

*E mensahe aki cu hopi esperanza  
den futuro ta  
nos mas sincero deseonan  
na tur nos abonadonan  
pa un Pasco Feliz y contento  
y un año Nobo brillante.*

*REDAKSHON di TARAY*

CRESI KELLY

GLENDIA GIL

TRUUS THIEL

CHINDA SEMELEER





Sinta d.r.p.d.: Betto, Chin Ruiz, Pedro, Chin Kelly,  
Para: Co, Maria, Ovito, Candi, Glenda, Jossy

Direktiva completo di  
CENTRO DI BARIO NOORD  
ta desea nos habitantenan di Noord  
Un Feliz Pasco y cu Aña 1981  
lo trece tur cos bon pa bosonan tur.  
Sperando tambe cu durante aña 1981  
nos lo hanja tur apoyo, ajudo, comprension,  
coöperashon di boso banda.  
“JUDA CENTRO DI BARIO NOORD TRAHA DURO,  
PA NOORD TIN UN BON FUTURO”



# UN FIESTA TRISTO DI SAN NICOLAAS Y PEDRO NEGRON



Mi tabata den 2e klas di lagere school y tabata tin siete anja di edad. Dia 6 di December ta acercando y ansioso nos tur muchanan, ta spera Sinterklaas cu su Zwarte Piet for di Spanje cu stoomboot. Cu hopi emocion y alegria nos curasonnan tabata bati, pasobra nos sabi cu e fiesta aki aki nos por hanja hopi juguetes bunita pa hunga. I no solamente esey, pero tambe e fiesta aki nos por hanja hopi juguetes bunita pa hunga. I no solamente esey, pero tambe nos sa hanja hopi cos du-shi di come, manera mangel, chocolati, speculaas y drikidek. Ta pesey dia 5 di December caba, nos tur for di tempran ta prepara e zapato cu jerba pa Sinterklaas su cabay come. Pero mi majornan tabata hopi pober y mi no tabata tin ningun zapato, pero un pargati. Pesey e atardi ey mi a laba mi pargati pa e no hole keesji, pa e no danja e jerbanan su horror. Tambe mi a bai den mondi pa bay piki e jerbanan di mas berde y mosa pa pone den mi pargati pa Sinterklaas su cabay.


Anochi mi no por a drumi y te laat mi a keda lanta sperando binida di Sinterklaas. Mi a lanta un rato pa busca un bleki cu awa, pasobra mi a hera lubida cu e cabay mester bebe awa tambe. Mi wowonan a bira pisa y mi a pega sonjo te mainta.

Ora cu mi a spierta, promer cos cu mi a haci, ta waak si Sinterklaas a laga poko regalo pa mi. Pero ki sorpresa mi a haja, di no a hanja nada abao di mi cama. Tur cos tabata manera mi a lage, ni e jerbanan e cabay no a come. Mi a puntra mi mes: "Ta di con Sinterklaas cu Zwarte Piet a pasa mi cas voorbij. Porta pasobra nos cas ta mucho bieuw of chikito of e porta nan ta mucho abao pa e cabay drenta?"

Ta di comprende cu mi a haya hopi duele y mi a cuminsa jora amargamente. Mi mama a trata na consolami y el a bisa cu podiser Zwarte Piet a lubida di scirbi mi number den boeki di Sinterklaas. Locual a pone mi bira mas tristu, ta ora mi a mira tur e muchanan den vicendario ta hunga

cu nan cos di hunga nan nobo. Ta di con nan si a haja bishita di e homber santo y ami no? I pa completa obra mi no a haja ni juguetes, ni mangel, speculaas y chocolati y mi pida drikidek, esta tristu ora cu bo ta pober no? Awor cu mi a bira grandi, mi a bay comprende tur cos, cu ta difi cil pa bo hanja bishita di Sinterklaas ora bo majornan ta pober. Ta pesey di awor en padilanti ora cu maestronan di school organisa un Bake-sale pa hanja fondo pa e muchanan pa fiesta dia di Sinterklaas, lo mi haci tur mi esfuerzo pa juda nan. Pasobra locual a pasa mi tempo mi tabata chikito, mi no kier pa pasa ningun mucha pober mas.

D.L.





# GRUPO DI AKTIVIDAD DI C.B.N.



E GRUPO A WORDO FUNDA ALREDEDOR DI OKTOBER/ NOVEMBER 1975 DOOR DI MARIA VROLIJK (ACTUALMENTE NA C.B.D.) Y MARIANNE SAS (HULANDES).

ESAKI TABATA UN DI E PROJEKTONAN DI NAN PLAN DI TRABAJO. (NAN TABATA STAGIAIRES, STUDIANDO PA TRAHADOR-NAN CULTURAL).

BOW NAN GUIA A CUMINSA CU NAN TAMBE, ANDRES RASMIJN Y ADRIAN BOEKHOUDT CU TABATA STUDIANTENAN DI A.P.A.



December 1975 prome dos gruponan a kuminsa. Esta ariba dianan diarason y diahuebs di 2'or pa 4'or di atardi. Despues cu e stagiairesnan a regresa Hulanda, Ineke v/d Hilst a keda coördinadora. Pa motibonan di trabao Ineke a pidi su retiro y e tabata mira tambe cu e gruponan tabata bay bon. E kier a lagé den man di lidernan di Nort mes, y Adrián como Coördinador.

E interes di e muchanan a bira asina grandi cu un grupo mas a bin aserca, riba diamars. E ora a

haja tres grupo. Na kuminsamento tabata dificil pa haja lidernan pa e gruponan. Apesar di e contratiemponan aki, cu tempo, nos a haja bastante lider.

Nos metanan principal:

- duna e muchanan di skolnan basico di Nort un formashon responsabel fisico (curpa), spiritual(mente) y social (trato) den nan tempo liber.
- pa e muchanan, cu nan majornan ta traha, por tin un caminda di bay y unda nan ta

bow di un guíashon responsabel, pa nan no coy caminda di caya.

- pa e muchanan por desaroya nan mes riba tereno creativo y expresivo.

Nos aktividadnan cu tabata wordo haci cu e muchanan ta e.o.:

- dianan afó (buitendag)
- lama
- excursion
- pintura y obra di man
- hersengymnastiek
- weganan (e.o. sport)

Tur esakinan tabata basa ariba e gusto di e muchanan, esta nan hobby.

Aktividadnan grandi cu nos sa organisá:

- show di moda
- anochi meicano (cultural)
- rifa
- show di Pasco (21 dec '77), na Imeldahof
- show di Pasco (21 dec. 78), na Imeldahof
- Biahe pa Bonaire (15–21 april '79), cual tambe tabata un exito mescos cu tur e otronan.

Den e cinco añanan cu a pasa e dos shownan di Pasco tabata un exito grandi. Y tambe e aktividadnan di mas grandi cu nos a organisa, tabata e viahe pa Bonaire, unda cu nos por a haja coöperashon tremendo serca tur e majornan.

Tin majornan a gradici nos masha y tambe tabata tin cu a duna nos critica, pero esey ta tur ora mes-ter tin despues di cada aktividad cu wordo organisá.

E muchanan a gusta hopi, y tin di nan tabata kier pa nos a bay Corsow despues.



Kontribushon: Den cuminsamento cada mucha tabata paga f 0,25 Despues como cu costo di bida a subi nos ta cobra f. 1,50.

Reunion: Un bez pa luna nos ta tene reunion si ta necesario mas bez pa luna.

Reglanan: Cada lider ta stipula su reglanan, teniendo cuenta cu e interes general di e lidernan.

Despues cu coordinador Adrián Boekhoudt a cuminsa hanje cu hopi trabao, e la pidi su retiro. A bira difícil e ora pa haya otro coördinador pa e gruponan por a sigui. Despues di warda hopi nos a bin haya como coördinador Pedro Figaroa. Pero pa poko tempo. Ata atrobe sin coördinador. Pero alafin nos a bin haya un otro coördinador den persona di Candi Boekhoudt y cual nos ta spera cu e lo keda pa basta tempo cu e gruponan. Tambe nos tin un Presidente, cual ta Marlène Semeleer.

Actualmente nos tin por lo menos 70 mucha cu ta partí den e tres gruponan.

E lidernan actual ta:

- Sra. Mena Tromp (5 año den grupo)
- Sra. Mimi Evertsz
- Srta. Marianita Wolff
- Srta. Marlène Semeleer
- Sr. Pedro Figaroa
- Srta. Glenda Correa
- Srta. Madelène Kelly
- Sra. Emy Farro
- Sra. Nono Giel
- Srta. Bea Wolff
- Srta. Ruth Tromp
- Srta. Ingrid Kelly
- Sr. Elvis Semeleer



Algun di e lidernan aki, tambe a tuma parti na e curso cu OSTI-CEBA a organisá pa jeugdleiders. E curso aki a juda e lidernan hopi pa siña con pa anda cu tur sorto di muchanan.

Apesar di hopi contratiempos, e grupo di Aktividad ta bay cumpli su prome lustro dia 3 di december 1980.


Nos ta gradici tur e lidernan bieuw y e personanan cu semper a duna nan coöperashon pa asina juda nos grupo traha duro y bay dilanti.

Nos deseo di más grandi ta pa Centro di Bario Noord por cuminsa cu e uitbreiding, pa asina nos por haya nos mes un lokaal di handenarbeid.





# DESEO DI AÑA



Un rato despues di tiru — lagá mi ganja cu m'a tende e tiru di tradicion cu tabata habri anja nobo - a pasa un homber canjá maner'un krif na mi cas, brasá mi y duná mi bon anja.

Cu lengua pisá di bebida ela lora un discurso cu a stranjá mi, aunke mi sa di esperencia cu hende burachi hopi bes sa papia cosnan masha cierto cu ta laga un hende na su tinu keda pensativo. Mi ta bai recitá su discurso evitando e pausa y hikmentu.

“Senyor, aunke nos no conose otro 'n ta nifica cu mi'n por desea un anja nobo. Mi ta spera cu e anja aki lo trese trabau, trabau y mas trabau.

Asina tantu trabau cu ningun hende 'n tin tempo ni pa grawata cabes. Mi sa cu ya hopi a desea bo un anja nobo yen di alegria; prosperidad y felicidad y mi'n sa cuantu co'i chonbong mas pero ami ta desea bo trabau.



Laga nan bisa na trabau ta bon pa buricu, ami ta bisa cu trabau ta tur cos. Un pueblo sin trabau por tin alegria, prosperidad, felicidad? . . . ah lage papia co'i chonbong.

Bo por tin cuanto placa cu bo ke pero si bo'n tin nada di haci, si bo'n tin trabau bo ta fada cu bo mes existencia.

Trabau ta precio di bo exito. Trabau y pensamentu ta fuente di forsa.


Trabau y diverticion ta mantene energia.

Trabau y lectura ta aumenta bo siencia.

Trabau y cortesia ta medalion di respet.

Trabau y mas trabau ta menos tempu pa maldad.”

Di: Ellis Juliana  
Saka for: Maka Taka




## OSTICEBA

Organisashon pa Stimula Centronan di Bario na Aruba ta desa un Feliz Pasco y un Aña Nobo, jen di salud pa asina bo por sigi traha na bienestar di nos comunidad.

Spera cu bo lo bira mas activo es aña aki.

“Juda bo Centro di Bario”.





# PASCO DI NACEMENTO



Tur anja dia 25 di december, henter mundo ta recorda e dia aki, cu Hesus Cristo nos dibino salvador a nace pover den un pesebre na e stad chikito cu jama Betlehem. Esaki ta e milagro mas grandi cu Dios Tata poderoso a planea pa haci pa nos, su jui-nan. I ta keda demostra pa eternidad ki gran amor nos Creador universal tin pa humanidad. Dios a humilla su mes y a laga su jiu encarna y bira un hende igual cu nos, pa di es manera aki reconcilia nos atrobe cu ne. E ta haci imposibel pa nos por comprende, pasobra nos sinti ta mucho chikito pa comprende misterionan di nos Creador. Pero ta nos fé christiaan ta sigui guia nos y Spirito Santo ta inspira y duna nos su donnan pa nos kere.

Un cos si ta sigur, cu ora tempo di Pasco ta acercando, tur hende ta cuminza sinti nan otro. Ta manera nos curasonnan ta bira mas contento y ansioso pa fiesta e dia di Pasco.

Ta un tradicion cu aki na Aruba nos ta cuminza drecha cas, mester verf, cambia cortina y tapijt, fura muebles etc. etc.

Hopi hende christiaan ta prepara nan alma debidamente den tempo di advent y ta bai tur e misanan di Aurora. I tambe nan sabi cu mester zaag e cácho tempran (manera e bieuw nan ta bisa) esta haci un confesion general.

Esaki pa regla ta mas principal di e fiesta di Pasco, esta prepara bo mes spiritualmente. Despues ta sigui e fiesta material cu tambe ta uni familianan hunto y natural-

mente tur hende christiaan.

Un cos si mi por bisa cu den ultimo anjanan, e fiesta di Pasco a bira un fiesta mas tanto di negocio. Pasobra tur comerciantenan ta probecha pa ranca tur lana cu nan por for di nos. Mi no kier acusa nan, pasobra ta pesey nan ta negocianta, pa nan haci mas ganancia posibel. Peo tin di nan cu ta abusa di e oportunidad, sabiendo cu nos tur ta busca un pida panja nobo pa e fiesta aki. Nan ta hisa nan prijs barbaremente y tambe ta saca mercancianan bieuw pa haci manera nan ta nobo.

Awor ta falta di nos mes, hende chikito cu e cosnan aki ta sosede, si nos tur cera cabez y bisa cu nos no ta cumpra na e prijsnan ey, nan mester baha prijs. Pero bay bek ariba e fiesta mes,

tin hopi di nos ta haci gastonan innecesario na fin di anja. Nos ta cambia hopi aparatonan di cas cu por wordo drecha, pa nobo, djis pasobra nos a cobra un poco bonus, pero ora cu anja nobo habri y cu mester paga tur e belastingnan y cu mester paga seguronan, number di auto etc., e ora ey nos ta plambari. Ta pesey mi kier conseha boso, di promer cu haci gastonan na fin di anja, pa traha un presupuesto di cosnan cu mester ser paga na principio di anja nobo.

Bon pa conclui mi kier desea boso tur sin ningun excepcion un Feliz Pasco di Nacemento y tambe un prospero anja nobo 1981. Laga nos tur pidi Dios pa plama su Bendicion ariba e Isla aki y tambe ariba henter mundo.



GRUPO UNI DI C.B.N.

Bon Pasco y Feliz año 1981;

hopi Salud, hopi forza, hopi comprension, hopi coöperashon  
bow di nos hende muhernan, ta nos mas sincero deseo pa e  
año venidero.



# UN PASCO FELIS PA UN Y TUR

Pa tur hende Pasco ta un dia di legria, pasobra riba es dia aki tur hende ta recorda nacemento di Cristo nos Salvador. Tur hende ta preparando y cumprando cosnan nobo y bunita pa e gran dia. Otro sea verf pa verf nan cas y kerstboom cu ta trese e ambiente di Pasco y otronan panja nobo. Tur esakinan sigun situashon cu e famia, pasobra depende si e famia ta un famia grandi y cu ta e cabez di cas so ta traha, tur jui- nan ta bay school ainda y e tata no ta gana mucho cen, anto nan no por cumpra cierto cosnan. Por ejemplo un famia cu tin un bon entrada tur cos nobo nan por cumpra.

Nan tin bebida gestock y tambe cosnan di come manera ham, horna, kalakuna, jena etc. etc. Y tambe bo ta hanja famianan cu nos no sa con nan situashon ta. Y pa nan tambe e dia aki ta un dia grandi y principal.

Pero pensando con pa hasi si tin hopi jiu y e mama no sabi con pa cuminsa y e jiunan ta mira con e bisinjanan ta drechando nan cas. Y ann tambe ta hasi pregunta: "Mama ki dia a nos ta verf nos cas, cumpra kerstboom y pone luz di color". E mama cu wowo- nan jen di lagrima y un curazon dolor ta bira su cara pa jiunan no ripara cu e ta jora.

Bisando: "Mi jiunan nos no tin cosnan di balor, pero nos mester



gradici dios cu boso tata ta traha ainda y cu pasenshi nos por sigi lucha y ora cu bosonan bira grandi nos por hanja tur cos".

E mama lo no tin suficiente placa pa cumpra panjanan caro y bunita pa e juinan. Cumprando panjanan barata y cu un machin bieuw e por a cose bistirnan pa jiunan homber i muher. Y e jiunan contento cu nan panjanan nobo ta juda nan mama laba nan cas limp y drecha bunita. Y la-

bando vloer di cas di walishali berde (mescos cu mistolin di awor) e vloer ta keda limpi y e cas ta keda hole dushi. Y lombrando nan stoelnan y cashi cu azeta di coco. Pañanan di cama y serbeta nan di mesa y cushina maske cu nan ta bieuw e ta labanan limpi, gumanan y strikanan bunita. PA USANAN PA PASCO Tur pafor bari limpi. Bolo, kalakuna ta cosnan cu nan lo no mira. Pero e dia ey si nan pam blanco lo nan tin. E cuminda di Pasco lo ta e mesun cuminda di tur dia. Y e dia ey nan lo come cu mas smaak. Placa pa un kerstboom no tabata tin, e jiunan mes a pensa algo; na a bai di nan cas corta pida watapananan, pone den un bleki cu santo den un hoeki. Y di e papel di silver di sigaria nan a traja nan adorno pa e kerstboom. Tarjeta nan mes tabata traha y scirbi Bon Pasco Mama y Papa. Te hasta un di nan a scirbi: "Dushi Hesus trece un kerstboom pa nos".

Pascu mainta bo ta hanja e famia aki na misa Tata, Mama y jiunan pa ricibi e Salvador den nan curazon y gradici Dios pa sigi judanan. Y puntra cu e famianan cu tur nan luho si nan ta corda gradici Dios e dia ey.

P'esey a nos ora nos ta den nos grandeza, nos mester corda nos bisinja of otro hendenan den nan pobreza.



# POLONIA: ENTRE ESTE Y OESTE

Polonia, un pais di contrastes. Un pais cu ta keda entre este (esaki kiermen paisnan perteneciente na e bloke comunista) y oeste (cu ta e sistema capitalista). Polonia mes ta un pais comunista pero cu tendencianan capitalista.

Den e bloke comunista Polonia ta esun cu mas ta desvia di e sistema aki.

Mientras cu e ideologia di Polonia ta socialista un mayoria grandi di e pueblo ta simpatisantenan fuerte di e iglesia catolica. Den paisnan comunista esaki no por ta posible.

Mientras cu segun "comunismo" un of cada negoshi mester ta di estado (gobierno), 80 por ciento di tera agraria ta den man di campesinonan particular.

Polonia un pais cu ta fronteriza cu Rusia anualmente ta importa masha hopi grano for di Merca, mas cu for di Rusia. Tambe e ta exporta pa paisnan di e bloke capitalista.

Aunke no tin hopi auto particular, ya cu esaki ta hopi cara mes; aunke hendenan mester para den filanan pa por cumpra algo toch por ripara algo di e bloke occidental: jovennan ta cana rond den jeans y radio transistor bow di brasa of e pueblo Polaco cu ta sigui reuni den gruponan grandi pa por papia, diverti, discuti, come etc. Algo cu no ta aceptable den un comunidad comunista. Tambe den varios ocasion nos por a mira e pueblo Polaco, e masa obreril sali dilanti pa su de-



rechanan, algo cu no ta existi den pais comunista. Na 1970 esaki a hiba lider di e partido comunista Gomulka den su caida. Na su lugar a bin Gierek. E obregonan a protesta contra e haltu costo di bida. Na aña 1980, pues e aña aki trobe nos por a mira algo parecido. E biaha aki nan a bai mas leeuw den pidi e gobierno di Polonia mas libertad pa formacionan di sindicato. Banda di esaki a bin mas exigencia. Te awe nos por observa e tencion cu tin na Polonia. Un ora pa otro lo por tin un invacion.

Esaki nos por considera como un lucha largo di e pueblo Polaco pa libertad y independencia total, pues pa sali fuera di influencia comunista.

E lucha aki no ta data di aña 1970, of 1976 of 1980. Esaki ta data desde oktober 1795 Polonia ta wordu dividi entre Rusonan, Austraconan y Prusianonan. Desde e dia ey Polonia no ta existi mas. Pa 123 aña esakinan a keda na e tera aki.

Despues di prome guerra mundial na 1918 e pais aki, Polonia, ta bira independiente, pero pa un

tempo cortico. Na 1939 Stalin cu Hitler ta parti e Pais aki den dos atrobe y na september 1 1939 e dosnan aki ta invadi Polonia. Tambe esaki tabata comienzo di guerra total na mundo.

Despues di guerra Rusia ta haja poder na Polonia y ta pone un gobierno di comunistanan guia dor di Moscu.

Awe na 1980 nos por mira cu Polonia ta un pais bow di mando di comunista pero e pueblo mes no ta sinti nada pa esaki. Pero e tendencia ta existi cu Rusia lo por invadi Polonia un biaha mas pa establece estabilidad na e pais aki y tambe segura defensa y seguridad di Union Sovietica mes.






# "Topico"

## DESTRUCCION

Destruccion por wordu defini como un arte di kibra, mal usa, laga insirvible o ruina propiedad ageno (o publico).

Cu esaki nos kier a mostra den "Topico" riba tanto actonan di destruccion cu ta ser cometi riba nos isla den e ultimo temponan aki. Nos lo no kier para ni muestra riba sierto actonan cu a wordu cometi, pero sino muestra irresponsabilidad di personanan: esakinan ta esunan cu ta comete e acto aki di destruccion y esnan cu ta presencia e acto aki sin tuma medidanan.

Awendia a bira algo (casi) normal cu hendenan, principalmente jovennan ta destrui propiedadnan ageno. Tin hende ta sinta puntra nan mes pakico tal actonan ta wordu cometi y kico lo ta e consecucionnan cu esaki lo por bai trece cu ne.



Laga nos wak un ejemplo. Un telefoon publico ta wordu kibra dor di un persona sin sentido di responsabilidad. Sopone cu un persona cai malo y mester di un ambulance. Telefono publico ta kibra. Kico haci awor? Con lo para cu e persona aki? Anto mester pensa cu e ta un familiar di e malechor!

Esaki ta un di e facilidad cu nos ta caba den nos comunidad. Tin mas p.e. transporte publico, banki den nos parquen, lus di trafico, lus canto di caminda, borchinan di trafico, caya, brievenbus, etc., etc.

Na ken e daño ta wordu haci? Na promer lugar na e Rubiano pagador di belasting. Embes cu e placa cu gobierno ta haja pa pone p.e. un telefoon publico mas, mester laga pone un otro telefoon publico cu a wordu kibra dor di personanan irresponsabel.

Na di dos lugar e persona cu a comete e acto. Pasobra mañan e mes lo bai tin necesidad di e facilidad cu tabata existi pero no por haci uso di nan pasobra nan no tey. Esaki tambe pa nos Rubianonan y e bishitantenan. Pues aki nos por mira con hopi biaha personanan ta comete acto di vandalismo y ta destrui propiedad di gobierno (publico) sin pensa dos o tres biaha.

Tambe nos kier a mostra riba un otro grupo di persona cu tambe no tin sentido di ningun responsabilidad. Esaki ta e personanan cu ta presencia e acto di destruccion sin di hala atencion di e otro persona cu ta cometiendo e acto of sin notifica esaki na autoridad. Hopi biaha un persona cu presencia algo asina, p.e. kibramento di un borchin di trafico, ta pensa: "Ay no ta ami ta paga toch. Ta gobierno ta paga." O: "Ta di gobierno e ta. Nan tin cu wak pa e cos aki." O: "No ta mi asunto."

Wel na promer lugar e ta bo asunto, di dos lugar abo ta paga y di tres, loke ta pone ey pa gobierno, como un facilidad ofreci na comunidad, ta algo di bo tambe. Pasobra bo tambe ta haci uso di esaki. Pues esaki ta un mentalidad masha abow mes cu hopi di nos tin ainda. E persona cu presencia e acto di destruccion tambe ta irresponsable. E no tin ningun sentido di responsabilidad. Loke ta relata aki riba no ta conta solamente pa propiedadnan publico pero particular tambe. Pasobra mañan por ta bo propiedad tambe.



# PASKO PA OTRONAN

Pasko ta un cos di alegria pa tur hende. Pasko ta trese alegria den bo kas i bo famianan. Pasko por ta hopi kos pa nos. Pasko ta un felicidad pa tur hende. Pasko ta pa tur hende bai misa.

Maybelline Christiaans

## PASKU DI AÑA PASA

Aña pasa nos a kumpra bala di kerstboom.

Nos a cumpra kerstboom. Nos a dorna nos cas hopi bon. Nos a baila hopi bon

Bo sa ku mi a bai bishita mi ruman i mi a hiba un regalo pa mi ruman muhe tambe.

Ajoooooooo Bon Pasko

di: Ivonne.

# CON NOS TA CELEBRA PASCO NA CAS

Pasco ta jegando, tur hende ta preparando, tur hende ta drecha nan cas ku un kerstboom, y pesebre. Bow di e kerstboom, y pesepi regalo. Semper ami mester hanja un regalo di mi mama y mi tata y di mi wela nan tambe. Mi number ta Aldrin Thode; 6 - B.

## KIKO TA PASKO!

Pasko ta un dia di pas. Pasko ta un dia felis Kiko ta pasko! Pasko ta un dia pa tur hende. Tur hende ta contento. Kon nos ta celebra nos Pasko? Na kas ami ta celebra pasko cu klapchi. Na cas pasko ta masha dushi pami. Pasko: tur hende ta drecha nan kas limpi y netji. Pasko, tur hende na kas ta felis. Danki mi nomber ta.

Roland Webb.

## KIKO TA PASCO I AÑA NOBO?

Wel pami Pasco ta un aña mas ta bini. Cu hopi alegria nos ta tira clapchi. Pero den e aña cu ta bini por pasa hopi cos, ta bini alegria i tristeza. Ora ta Pasco tur hende ta bai misa. Nan ta bai cas, come pia di ham i hopi cos mas. Oke, aki mi ta jega cu mi storia e ta chikito, pero mi ta kere cu bo so lo gusté. Ajo.

Bon Pasco y Bon Aña nobo di parti di: Marion

Pasko pa mi ta e dia di mas bunita di mi bida. Semper mi a gusta Pasko. E dia e'i mi ta bai misa pe ultimo dianan di anja. Danki.

Di. Raquelita Adelaida Ruiz

# KON NOS TA CELEBRA PASCO.

Nos ta celebra Pasco cu kerstboom y cu Pesebre. Despues nos ta come bolo y bebe champanja. Nos ta keda lanta te cu 1'or di marduga i nos ta pasa dushi mes. Danki esey ta tur. Bon Pasco.

Di Miriam Olivia Franken

## PASCO PAMI

Na mi cas Pasco ta bonita pami. Pasco mi ta tira klapchi mi ta pasa pret na mi cas. Na mi cas mi ta core bais i mi ta core auto y kome hopi. Nos ta bebe refresko i bolo i balia henter dia. Nos ta hunga contentu i alegria. Danki:

Armando Gavidia.



## PASKU PA NOS TUR.

Pasko ta un dia di felisidad y prosperidad. Pasko ta pa nos celebra nacemento di nos Señor Hesu Cristo. Pasko ta un dia pa nos ku tur nos rumannan. Nos ta celebra pasko na 25 dec. y e dia ey nos ta sinti nos felis. E ora ey nos ta recorda Cristo cu a nace na Betlehem den un pesebre. Ami ta desea boso tur un bon pasko y un felis anja Nobo!!



Anibal Tromp

## PASKO P'AMI

Ami ta hanja pasko un gran dia. Pasko, tur hende ta contento. Nos tur ta celebra pasko. Tur hende ta bisti bunita, bai misa y hasi fiesta cu nan famia. Unda cu bo pasa bo por mira lusnan masha bunita i kerstboom bestial dorna. Hopi hende ta hari y jora parew di contento.

Rosa Maria Boekhoudt.

## KIKO TA PASKO

Pasko ta un kos ku tur hende ta celebra. Ora Pasko jega tur hende ta contento. Pasco, hende ta pone un kerstboom na kas. Ora bo mira e kerstboom, esaki ta recordabo kos di Pasko. Na e momento ei bo ta sintibo jen di felisidad. E dia di Pasko tur hende ta bai misa. Ora ma jega kas nan ta kunsu celebra e Pasko. Esei ta kiko mi ta pensa di Pasko.

Joao da Silva

## PASKO I AÑA NOBO

Pasko ta alegria den tur kas, pero tin kas ku tin tristeza. Ora ku diesdos or a bati mi ta sende e rol grandi di klapchi i donder boos.

Rebecca



## KIKO TA PASCO

Pasco ta un dia di pas, pas pa mi. Pasco ta un dia di Dios. Kon nos ta celebra Pasco na nos kas. Na kas a mi ta celebra pasco cu klapchi, anto mi ta tira nan aña nobo ora di 12.00 dia nochi. E ora ta tira mi klapchi cu hopi smaak. Anto mi ta bisa bon aña. Na kas pasco ta masha dushi pa mi. Ta un dia pa tur hende den mundo lo celebra pasco.

## CON NOS TA PASA FIN DI AÑA.

Ami ta pasa mi Pasco bon na kas. Aña pasa nos a tira klapchi nos a pasa hopi bon mes. Ora cu diesdosor a bati mi a sende e rol grandi di klapchi i donderboos. Nos a bebe hopi champanja.

Bon Pasco.

## PASCO DI AÑA PASA

Aña pasa den fiesta di Pasco nos a compra tur loke nos mester. Pa Pasco: Kerstboom, bala di kerstboom. Nos a duna nos cas un "goeie beurt". Dia 25 di december nos pues prome dia di Pasco nos a bay misa y despues nos a bay cas come y nos sa sali atro- be. Danki di

Kathleen Figaroa.

## KON NOS TA CELEBRA PAS- KO (NA KAS)

Bon dia. A nos ta celebra pasko bon. Pami nos ta celebra hopi bunita. Nos ta sali na kas na kas, i bai na kas di bisiña. Pami pasko ta un dia di felisidad y alegria. Nos ta celebra pasko di nacemento di nos ruman Hesus. I nos ta lanta i bai misa mainta.

danki  
Gladys Irausquin  
Bon Pasco.

Pasko pa mi ta un dia feliz i ku tur hende por celebre. I semper mi ta gusta pasa pasco. Ami ta kere ku tur hende ta gusta pasco. Tur hende ta celebra Pasco na nan cas. Mi ta spera ku tur hende por pasa un bon Pasco. Danki di Juffr. Aquelita Virginia St. Alloysius klas 6 - B.

## PASCO DI AÑA PASA

Pasco cu a pasa nos tabatin kerstboom y ami a kumpra un pesebre. Atardi nos a bai misa y tin hopi tin hopi hende den misa. Ora misa a kaba nos a bai kas. Tabatin fiesta di pasco na cas y nos a pasa hopi dushi.

Danki: di Juni Kock





# RECETANAN

## CARNI DI PORCO CU COLO

2 liber di porkchop  
2 sibojo (corta chikito)  
5 pida konoflo (corta chikito)  
2 tomati (corta chikito) of 1 bleki.  
1 1/2 liber di colo corta pida, pida.  
4 cuchara grandi di azeta dushi  
1 koppi di binja corá, zuur, salu y peper.

Ta dora e sibojonan den e zeta cayente, ta saca nan pone un banda y hasa e porkchopnan hunto cu e konoflo den e mesun zeta, bruin tur banda.

Ora tur ta hasá, pone nan den un wea hunto cu e sibojo, tambe e colo, tomati, salu y peper y laga nan cushi un 1/2 ora.


Despues di e 1/2 ora ta basha e binja aden y lage smoor riba un candela abao un 10 minuut mas of te ora e porkchop y colo ta moli. Por sirbie cu aros, macaroni of spagetti.

## MACARONIE CU WEBO NA FORNO

1 lb. di macaroni  
1 bleki di soppi di mush-room (cream of mushroom soup)  
1/4 koppi di lechi  
1 koppi di keesji raspá  
1/4 koppi di promenton cortá chikito.  
1 sibojo (corta chikito)  
1 cuchara chikito di mosterd  
4 webo herbe (corta na sneetji)  
1/4 koppi buscutji soda garná  
2 cuchara di manteca dirti. Salu, peper.

Herbe e macaroni den awa cu salu te ora e ta moli, y despues score su awa afor y basha e soppi den e macaroni, tambe e lechi, e

keesji, e promenton y sibojo. Drei nan bon den otro y pone aserca a mosterd y peper y un tiki salu segun smaak. Den un forma huntá cu rees nos ta basha mitar di e mescla aki y riba dje e webonan herbe cortá y despues e sobrá mescla di macaroni. E buscutji nos ta bruha den e manteca dirtí y strooi e riba e macaroni. Ta horné un 40 min. na 350o. Ora e ta cla ta bolter e riba un tajo y dorné cu mas webo herbe y pa mas bunita cu pida pida peti-celi. Bon Apetit.



## PISCA NA FORNU

6 filet di pisca (cora)  
1/2 liber di keesji raspa.  
2 sibojo corta chikito  
1 cuchara grandi di harinjañ di pan  
1 lamoenchi  
2 cuchara grandi di manteca di cushiná  
2 cuchara grandi di casca di pan garna (of pan bieuw raspa)  
1 koppi di lechi  
1 koppi di crema di lechi, salu, pica, nutmuskaat.

Laba e filetnan y hinka nan cu lamoenchi, salu y promente.

Hinka un forma cu rees y pone den dje mitar di e cantidad di keesji raspa, mitar di e sibojo corta y riba nan e filetnan di pisca. Awor ta pone riba di e pisca e sobra keesji y sibojo y aki riba ta strooi e harinja di pan. Ta basha awor e lechi y crema di lechi y ta bolbe pone poco promente y salu y tambe e nutmuskaat. Mas ariba ta pone pida, pida manteca y mas ariba e casca di pan. Ta horné den un forno no mucho cayente un 30 minuut.

## BOLO DI FRUTA DEN FRIGIDAIRE:

3/4 koppi di lechi evapora.  
2 dozijn di marshmallows corta chikito  
1/3 koppi di juice di appelsina  
6 dozijn buscutchi soda chikito.  
1/2 theelip di kaneel na polvo  
1/4 theelip di nutmuskaar na polvo  
1 1/2 koppi di raseentji sin pipita (mitar blanco, mitar bruin)  
3/4 koppi di daderconfijt corta chikito.  
1 koppi di neetji garná  
1 1/4 koppi di fruta francees (candij)

Basha e lechi, e marshmallows y e juice den un komtji y larga nan para un rato. Garna e buskutjinnan cu un rolstok, haci nan wiri-wiri finí.

Den un komtji grandi pone garna di buskutjinnan hunto cu e kaneel, nutmuskaat, kruidnagel, raseentjes, dader y neetji y tambe e fruta frances cortá chikito. Ta basha awor den esakinan e mescla di lechi cu marshmallows y juice y nos ta bruha nan bon den otro te ora e buskutjinnan tur ta muhá. Den un forma cu trechter meimei ta pone vetpapier den bom y tambe na randnan y ta basha e mezcla aki aden y primie pak e bon den e forma y tapa esaki. Ta pone 2 dia den freezer pa e vries bon prome cu corté y despues e mester keda den frigidaire.







# BAN CANTA WARD PASCO



## LLANTO DI UN MAMA

Aw nochi ta nochi di Pasco  
awe nochi ta nochi di pas  
maské otro pafó ta contento  
mi ta tristo solito den cas.

Mi ta mama di un yui na Hulanda  
cu ta spera un carta kisás  
padèn, den curá, den veranda  
ya maccana te cu mi n' por mas

### Refrein

Maske Pasco pasabo foi tera  
maske Pasco pasabo foi cas  
cord'e bieunan kisás cu ta spera  
rib'e yuinan cu ta leu di nan cas.

Esta tristo pami awe nochi  
ora Pasco lo yega porfin  
cu retrat'i mi yui riba scochi  
mi lo sinti y yora sin fin.

Ay mi yui cu ta leu di bo tera  
bo no sa con bo mama t'awor  
ya e kloknan di Pasco ta spera  
pa nan plama nan canto pafó.

## NOCHI DI PASCO

Ora kloknan lo canta contento  
riba e anochi sublime di pas.  
Lo mi biaha den mi pensamiento  
pa mi jega na mi dushi cas.  
Esta un Pasco pa mi sin consuelo  
si mi pensa mi isla natal.  
Mi ta sinti calor di su suelo  
sin por llega na e cas maternal.

### Refrein:

Ora kloknan lo canta contento  
Riba e anochi sublime di pas  
Lo mi biaha den mi pensamiento  
pa mi pasa mi Pasco na cas.

Mi'n por splica e friu den mi alma  
mi n'por conta mi pena sin par.  
Rib'e anochi di Pasco n'tin calma  
pa un yui cu ta leu di su hogar.  
Canta kloknan y plama 'legria  
masque semper lo tin curason  
Cu ta lloira cordando tal dia.  
riba e sernan di nan stimashon.



## MI TUMBA

Ban ban busca  
pa ram pam pam pam.  
Nos Rey a nace  
Hiba regalonan  
Pa dun'e Rey Chiki  
Pa nos adoré  
Ban unbes.

Mi ta pover  
Mi n' tin regalo p'E  
Cu tin un gran balor  
Lo mi bai toca p'E  
Toca mi tambú  
Mi tambú

Baca, lamchi  
Ta tene warda p'E  
Maria y San Hosé  
Ta para admiré  
Mi a toca p'E  
rib'un tambú




## CAMPANA DE BELEN

Campanas sobre campana  
y sobre campanas una  
asomate a su ventana  
verás a un niño en la cuna.

### Refrein:

Belén, campanas de Belén  
que los angeles tocan  
que nuevas me traen.

Recogido, tu rebaño  
a donde vas pastoricito,  
voy a llevar, al portal  
rewuesón, manteca y vino.  
Refrein:





## PASCO TA YEGANDO

Pascu ta yegando  
tur hende preparando  
hopi boca dushi  
bistirnan mas bunita  
Pero mi n' por prepará  
cu mi doei ta na Hulanda 2x  
kiko mi ta celebrá

Ora klok ta bati  
ora nan ta brasa  
Solito mi ta sali  
Pafó ku mi tristesa  
Pero mi n' por yora tanto  
pero mi n' por yora tanto 2x  
pa ni un hende n' ripará



## BON PASCU

Awe ta 'un diá grandi, dia di celebrá  
Pasco di nacemento Jesús a nace  
Muchanan ta bisti bunita,  
nos tur ta luci bon.  
Gozando di e dia, tan hopi anhela 2x

Tur hende ta bai nan misa,  
pa tuma nan bendición  
Speransa di cu e dia lo trece bon pa nan.  
Muchanan ta bisti bunita,  
nos tur ya ta luci bon.  
Gosando di e diatan hopi anhelá 2x

### Refrein:

Nos kier deseabo awe.  
Bon Pasco, Bon Pasco  
Un día placentero,  
Bon Pasco, Bon Pasco  
Bendición pa boso tur,  
Bon Pasco, Bon Pasco.  
Fiesta bon y gosa bon,  
Bon Pasco, bon Pasco.  
Bon Pasco, bon Pasco.  
Bon Pasco, bon Pasco.

## FELIZ NAVIDAD (di José Feliciano)

Feliz Navidad (3x)  
Prospero año y felicidad.

I wanna wish you a merry Christmas (3x)  
from the bottom of my heart.

Feliz Navidad (3x)  
Prospero año y felicidad

Ta nos deseo t'un Pasco felis. (3x)  
Di henter nos curasón.



## NOS DESEO

Nos ta desea tur Antiyanonan  
hopi alegría den nos temponan aki  
laga nos tur canta cu henter nos curason  
p'e año benidero por trese bon pa nos.

### Refrein:

Bon año, bon año  
ta deseo di nos tur  
Bon año, bon año  
alegria pa un y tur.

Desea mamá y tambe nos papá  
un año tur contento, yen di felicidad.  
felicidad  
Cu Dios por duna nán hópi año mas.  
den nos compañía y tur famianan.

Cu Dios su bendicion por baha riba nos.  
y trece pas di e Niño y tur prosperidad  
Laga nos tur sigui e caminda indicá  
y biba henter año den pas, unión y amor.



## WE WISH YOU A MERRY X MAS

We wish you a merry christmas  
we wish you a merry christmas  
we wish you a merry christmas  
and a happy new year.

Good tiding to you,  
where ever you are  
good tidings for christmas  
and a happy new year.





## DIN — DIN — DIN

Refrein:

Din din din, ya ta nos or'i bai  
Din din din, camind'i Betlehem  
sSan Hosé y Maria  
ta baha foi Nazaret 2x

1. E birgen Maria  
Humilde y sencillo  
ta un maravilla  
di e dichoso edén
2. Riba un burico  
Maria ta sintá  
Hosé wardador  
experto guiadó
3. San Hosé y Maria  
a bai Betlehem  
unda nos Hesu  
a nace den un stal.

## CAMPANITA NAVIDEÑAS

Campanita que vais repicando  
Navidad vais alegre cantando  
A mi me llegan los dulces recuerdos  
del hogar bendito donde me crié  
Navidad, y aquella viejita que tanto adoré  
Navidad, y mi madre del alma que no olvidaré  
Navidad que con dulce cantar  
se celebran las almas que saben amar.  
Ay que triste es andar en la vida  
por sendas perdidas lejos del hogar.  
Sin oír una voz cariñosa  
que diga amorosa: llegó Navidad  
Navidad. (4x)



## CANTEMOS, CANTEMOS

Refrein:

Cantemos, cantemos  
Gloria al Salvador  
feliz noche buena (3x)  
nos dé el niño Dios.

1. Tú eres la esperanza  
Tú, la caridad  
Tú eres el consuelo  
de la humanidad
2. Es la noche buena  
de grata memoria  
porque vino al mundo  
el Rey de la Gloria.



## DIN — DIN — DON (wijs: "Jingle Bells")

Refrein:

Din din don (2x)  
nos ta canta awé  
paz na mundo  
pa tur hende  
nos ta canta awé  
Din din don (2x)  
nos ta canta awé  
Alegria, alegria  
Nos ta sinti awé

Pascu a jega awé  
el a trece pas,  
Trece alegria  
den nos curasón

Ata Pascu a bin  
yen 'i felicidad  
laga nos tur hunto  
sera amistad.



## BAI CONTA NA TUR HENDE (wijs): Go tell it in the mountain)


Refrein:

Bai conta na tur hende, trai sero y tur caminda mes;  
Bai conta na tur hende cu Cristo a nace awé.

Den pesebre humilde, Hesus a nace:  
pa trece pas y salvacion, pa tur cu kier sigié  
Aleluja.

Wardadornan den cunucu, kuidando nan karné  
diripiente a weita lus, den shelu yen splendor.  
Aleluja.

Nan a sigi e strea straño, pa nan busca e salvador,  
den pesebre den un stal, Nan ta hay'e Redentor.  
Aleluja.






## TUTAINA, TUTURUMA

### Refrein:

Tutaina, tuturumá  
tutaina, tuturumaina  
tutaina, tuturumá turumá  
tutaine, tuturumaina

1. Los pastores de Belén  
vienen adorar al niño  
La virgin y San José  
Los reciben con cariño
2. De belén vienen también  
con incienso, mira y oro.  
Ofrendan a Dios su bien  
como el mas grande tesoro.
3. Vamos todos a cantar  
con amor y alegría  
Porque a caba de llegar  
de los cielos el Mesías.



## CAMPANITA DE NAVIDAD

1. En la capilla hay repique  
de campanan navideñas  
Y en el pesebre una virgin  
mira su frente serena.  
Y una sonrisa ilumina  
su carita de azucena.

### REFREIN:

Lang, ling, lang,  
las campanitas soñando están.

2. Cada mañana en la torre  
de la iglesia campesina  
Las campanas se despiertan  
a pesar de la neblina  
Llegando la noche buena  
lanzan alegres al viento



## BURRITO DE BELEN

Con mi burrito sabanero  
voy camindo de Belén

Se me ven 2x  
Voy camindo de Belén

Con mi cuatrico voy cantando  
mi burrito va trotando 2x

Si me ven 2x  
Voy camindo de Belén

El lucerito mañanero  
ilumina mi sendero

Si me ven 2x  
Voy camindo de Belén

### Refrein:

Tuki, tuki, tuki, tuki  
Tuki, tuki, tuki, tuki  
Apurate mi burrito  
qque ya vamos a llegar  
Tuki, tuki, tuki, tuki  
Tuki, tuki, tuki, tuki  
Apurate mi burrito  
que ya vamos a llegar  
Tuki, tuki, tuki, tuki  
Tuki, tuki, tuki, tuki  
Apurate mi burrito  
vamos a ver a Jesus.



Cristo a bini aki na mundo pa trece unidad  
Laga Su presencia, Su poder i Su Amor  
Uní nos pa felicidad di un i tur.

Esaki ta deseonan sincero di:  
— Consejo Parokial Noord  
— Asistencia Social Noord  
— Pastoor J. Nijverberg



NADA NO A WORDU PUBLICA RIBA ESAKI. ELA WORDU DESMENTI. BUKINAN DI HISTORIA NO A HACI MENCION DI ESAKI. PERO TESTIGONAN TA ASEGURA CU RIBA E PROME PASCO DURANTE E PROME GUERRA MUNDIAL 1914 - 1918 NA UN PARTI DI E FRENTE NA EUROPA TABATA TIN UN CELEBRACION DI PASCO DI NACEMENTO ENTRE ALEMANNAN Y INGLESNAN. MANERA RUMAN CU OTRO NAN A FESTEJA ESAKI. UN STORIA, PERO CU A KEDA PA HOPI TEMPO SECRETO.

# PASCO

## DEN TERRA DI NINGUN HENDE

Ora cu na augustus 1914 e “guerra” a cuminsa, hopi a pensa cu esaki lo no bai ta un guerra di duracion largo. “Pa Pasco sigur sigur cu tur e jovennan lo ta na cas,” asina tabata wordu bisa ora cu e soldanan a parti pa e frente.

Pero tres luna despues ora cu e guerra a escala tabata bisto cu e guerra aki tabata birando algo mundial y cu un posible solución no tabata na bista.

Pa november 1914 e frente na Europa tabata core di e costa Belgica te na e frontera di Swissa, un distancia di mas cu 800 km.

Di e soldanan cu a bai frente na Augustus hopi di nan a perde nan bida. “Pa Pasco nan lo ta na cas atrobe,” tabata zona fofo. Pasco di Nacemento lo wordu celebra pa hopi den friew.

Ora cu scuridad tabata podera di e Anochi hopi soldanan a purba di haci algo ainda pa ta den ambiente di nochi di Pasco. Nan tabata sinta banda di otro, y tabata conta otro recuerdonan di cas y tabata haci chansa di e miseria di guerra cu tin nan leuw for di cas.

### LUSNAN DEN ANOCHI

Na un sector di e frente tabata tin movimiento. Segun testigonan a relata despues cu e centinela (schildwacht) na e parti di e liña aki, ocupa pa aliadonan cu na e otro banda, serca Alemanan, algun lus chikito tabata aparece.



Despues nan a scucha stemnan y musica. Nan no tabata sigur cu si ta zonido di simfonia di man of di boca, pero si nan a reconoce e wijsnan di e canticanan di pasco, cu tabata pasa over di e terra di hende (niemandsland, esaki ta e parti cu ta keda entre e dos trincheranan (loopgraven) di cada ejercito) y ta yega na nan horea. Cada rato e lusnan tabata brilla mas y mas y e cantamento ta bira mas duro. Un di e centinelanan tabata observa e liña enemigo ora cu su sargento a bin controla. E centinela a puntrra: “Ki mi sargento ta pensa di esaki?” Y e contesta tabata: “Nan ta loco, tene nan bon na bista, e por ta un truco.”

Pero esaki no tabata un truco y esaki nan por a constata e siguiente dia. Gara dor di e kentura di Pasco e soldanan di ambos banda a cuminsa canta y tabata grita den direccion di otro. Cabesnan a cuminsa aparece over di e prikkeldraadnan, cual den circunstancianan normal tabata peligroso. For di banda di Alemanan algun soldanan a cuminsa ta zwaai nan man den direccion di e Inglesnan. Otronan a sali for di nan trincheranan y di banda di e




Inglesnan algun chabelitos a decidi di laga nan escondite y bai tambe den direccion di e Alemannan. No tabata tin ningun tiro. Y e milagro di Pasco di nacemento a sosode, aunke e ta parece increible den un atmosfera di guerra. Di cada banda di e liña soldanan tabata pasa over di prikeldraadnan. Nan tabata busca caminda entre e crateran ocasiona pa granadas te cu nan, Alemannan y Inglesnan, a encontra otro den terra di ningun hende. Pero un a cuminsa sonrei, un di dos a duna man. y un di tres ta haci mescos. Asina enemigonan a duna otro man. Den corto tempo e soldanan a cuminsa duna otro man, brasa otro y saluda otro y den e trincheranan e canticanan di pasco tabata zona mas. Sigaria y Siga tabata wordu parti Algun di nan a bin cu nan "whisky" of "schnaps" y nan a proost cu otro. Inglesnan y Alemannan a msutra otro potretnan di cas y tabata conta otro di cas. Un di e Alemannan a yega di biba na merca y a fungi como tolk. Asina tur por a comprende otro mihor.

Despues tabata tin un partido di futbol, cual partido sin duda lo tabata esun di mas sensacional den futbol internacional. E equipo di Alemannan a gana 3 - 2. Tambe nan a decidi cu pa mei anochi ningun lo no tira riba otro.

Asina pues e pasco di 1914 a wordu festeja na e sector aki. Pa un momento e enemigonan a lubida guerra y nan tabata consiente cu nan tur tabata humano. Ora cu e siguiente dia e prome tiro nan a wordu scucha hopi a puntranan mes si loke a pasa e dia anterior tabata realidad of un sueño. Otronan tabata bergonsa pa nan actuacion cual no ta wordu considera como di un militar. Preocupacion tabata tin den staf general pa cu e sucedido. Nan tabata tin miedo cu esaki lo por a sosode atrobe. Pa e siguiente año

nan a tuma precaucion. Di parti di Alemannan nan a staciona un franco tirado y di parti di Inglesnan oficialnan tabata descurasha e soldanan riba e pensamiento di pasco.

Na e Pasco di 1915 no a bin ningun celebracion. Asina un solda Ingles a skirbi despues di Pasco di 1915: "Un halá di nos a celebra Pasco cu calacuna y pudding den nos trinchera. Ora cu tur cos a caba, nos a sali pafor y a treat e otro banda cu granadas."



#### PORTA

B'a habrí  
bo porta di bida  
ey b'a para  
si, ey mes  
puntrando  
kiko  
lo tin  
ey tras?



#### UN MAN

Un man  
será,  
stijf  
i na mokete  
un man  
habrí,  
puntrando  
i dunando  
un man  
di mi  
hunto  
na kamina  
o  
hunto  
kada ún su so?



#### MAÑAN

Mañan  
ora mi wowo habrí  
lo tin paz  
i amor  
entre abo i ami  
entre e i ami  
entre Dios i ami  
tur cos lo ta otro  
feliz, lo mi ta,  
mañan kaba . . . . .



#### ORACION DI UN MAKAKU

Pa kiko Bo a kreami asina mahos  
Pa via di mi fealdad,  
e humor ta ponemí kambia kara.  
Den Bo creacion,  
semper lo mi keda e payaso?  
Ken lo por desterra  
e melancholía den mi curason  
Bo no kier acepta, Señor,  
ku ariba un bon dia  
Nan lo tumami na serio?







UN PASCO FELIZ Y CONTENTO  
UN AÑA NOBO BRILLANTE  
YEN DI PROSPERIDAT, ALEGRIA Y BENDICION  
TA NOS MAS SINCERO DESEONAN  
DI  
PERSENEEL DI IMELDAHOF I MUCHANAN

#### HERIDANAN CHIKITO:

Un cos cu por pasa tur dia. Ta bon pa sempter tin den cas 1 botter di mercurochrome y gaas steril cu bo por haje na botica. Mester tin diferencia entre heridanen chikito. Tin raspa - dal - corta y kimamento.

Ehemplo: — un gewoon dalmento. Bo ta stoot bo pia contra un kashi, e kuero ta keda bon, e no ta kibra, ma despues ta bira blauw.

Ta bon pa asina un cos asina pasa na ki parti di bo curpa (sin herida) pa pone ijs riba dje pa un 10 minuut, despues di mitar dia duna e lugar un massage y sigi sin ningun clase di tratamento extra. Cortamento: ta un herida den e cuero, e rand di e cuero ta habri for di otro. Un corta basta grandi bo ta tape cu un gaas steril. y bai dokter mesora. Dokter sa cu e mester cosé si of no. Si un herida apsa mas cu 8 ora e no ta wordo cosí mas.

Un corta chikito: - bo mes por spoela bon cu awa frieuw, despues pone mercurochrome riba dje y un pleister. Tene e rand nan bon serca otro prome cu pone pleister, despues di 3 dia kita e pleister.

Ora di raspamento: - ta spoela e raspa cu awa frieuw, pone mercurochrome y largé habri, si bo kier e tapa hasie cu un gaas steril.

Ora di kimamento chikito: — basha awa frieuw pa 10 min. riba dje, si e cuero no a kibra nos mester haci nada mas cu ne. Si lanta un blaar, no kiebré, si e cuero a kibra, laba y pone un gaas steril riba dje.

E cos principal di tur e heridanen chikito aki ta:

- pa duna e partinan cu a sufri sosigo; - no grawata nan, tene nan limpi y pone mercurochrome riba nan y no usa verband sin tin mester.

Pa termina: - pa dal, corta, y kimamentoe grandi bai dokter mesora.



#### ANGINA OF INFLAMACION DI KLIERNAN DI GARGANTA

Prome cu sigi riba esaki ta bon pa sa cu e kliernan aki of amandelnan ta sirbi pa stroba bacterianan di dreñta bo curpa. Awor cu nan ta malo, nan por ta corra hincha y dolo, esaki ta wordo causa pa stepto coccon, un sorto di bacteria, y por duna hopi keintura dolor di cabez, di oreña y ora di guli. Angina por ta un complicacion di un griep pisa y roodvonk (escarlatina) lombra paga. E bacterianan ta dreñta e amandelnan y causa un inflamacion (angina).

Ora tin hopi keintura ta recomendabel pa bai bo dokter di cas cu lo duna remedi pa kité. Sino un hende cu poco dolor di garganta por gorgel bon cu awa di reis di seidi herbí.

Bebe hopi likido pa asina e bacterianan por wordo laba y oriná. Complicacion cu por wordo causa door di angina ta nefritis - un malesa di niernan - reumatismo y malesa di curazon. Tin biaha hende por haje angina asina hopi biaha cu e amandelnan no ta funciona bon mas, nan no por stroba e bacterianan di dreñta bo curpa, anto e ora ta recomendabel pa bai bo dokter di cas, cu podiser por manda bo un especialista di gargante pa larga saca nan.




KOOR STA. ANNA  
 TA  
 DESEA  
 PUEBLO DI NOORD  
 UN PASCO FELIZ Y CONTENTO  
 Y CU E ANJA VENIDERO  
 LO TRESE PAZ Y AMOR  
 DEN NOS CURASON

**Bon Pascu**  
**Feliz Aña**



SKOLNAN DI NOORD ESTA:  
 – CAYENA KLEUTERSCHOOL  
 – ST. ALOYSIUSSCHOOL  
 – ST. ANNASCHOOL



ta desea pueblo di Noord y e hubentud escolar en especial  
 Un Feliz Navidad  
 Un prospero Año y Felicidad